

Jakobo

(Jacob)



Endela mu nivuru noroma Wita 25:19-34; 27:1-28:22

Livro para novos leitores na língua Ecuwabo
Nível 3

Ficha Técnica

Título: Jakobo
 (Jacob)
 (Jacob)

Língua: Echuwabo

Ilustrações: Art of Reading 2.0


Primeira edição electrónica, 2010

Produzido por: Wycliffe SA
 lidemo.net@gmail.com
 C.P. 652
 Nampula, Nampula
 Moçambique

O utilizador pode copiar e distribuir a obra



Wahikala nlogo nali na ahima eli. Babiwa wacemelriwa Izaki wamutele Rabeka. Anawa ali Ezahu na Jakobo abaliwe anakono. Ezahu wali munddimwaya mwa anakono. Jakobo wali muñgonoya. Babe wamukweleca vaddiddi Ezahu. Mahe wamukweleca vaddiddi Jakobo.



Ezahu wali namatota vinama. Iyene wanziveliwa okala mukokolane. Wankasa winama wila akane oja sabwa ya amudhi ahe.



Ezahu wansasanyedha dhoja dha babe. Babe wanziveliwa vaddiddi dhojadha.



Jakobo kali ninga mbale. Kaziveliwa otota vinama. Iyene waziveliwa okala mmusasani. Waziveliwa ofwasa.



Nlabo nimodha Ezahu odhowa otota. Ohiyele ciguwo vaddiddi. Wahilema na wahikana dala.



Ezahu odhowa vali Jakobo aloga:

- Kadivahe oja opihile weyo.

Jakobo barumela, alogaga:

- Ndowe nicinje ekalelo yokala mwana woroma na oja.

Ninga Ezahu wahikana dala, orumela. Baloga:

- Ddinfuna okwa. Eci kiinddipurela elobwene mwa miyo.


Dhahene Ezahu ohucinja ekalelo yokala mwana woroma na oja.



Ezahu wahikana dala vaddiddi. Kahonile ttima yokala mwana woroma. Oja jali ttimaya mwa iyene. Orumela na badhubela. Bapikirela onvaya ondhimwa wahe Jakobo, mbale muñgonoya.




Ezahu baja oja omvahile mbale.



Mudhidhi mwina, Izaki babe wa Ezahu na Jakobo wali ohuluvala vaddiddi. Iyene kahona. Izaki wanfunu omururiya Ezahu, mwanahe munddimwaya. Bamukuwela Ezahu mmusasani mwahe na baloga:

- Miyo ddihuluvala. Ddinokwa. Nlabona kaddinziwa. Kadhowa watote enama mukokolani. Opiye oja onziveleiweca miyo. Miyo ddigaja ddinoruriya baddinati okwa.

Rabeka mamayahe Ezahu na Jakobo owiwa. Sabwa iyene wali vakuvi. Ezahu odhowa mukokolani otota enama.



Rabeka ottamagela oli Jakobo, omwaddela ehiwile iyene, alogaga:

- Kapa mbuzi bili. Miyo ddinopiya oja wa babo. Ogamala ottukulele oja oli babo. Odhowe wamunyengette babo. Iyene onela ohubwela wi weyo oli Ezahu. Babo onela ohruriya ninga mwana woroma.



Jakobo bahona wila kinodheya wila amunyengette babe. Iyene ologa:

- Mama mbalaga Ezahu okana oweya vaddiddi maningoni mwahe. Miyo kaddina Baba agaddipapasa miyo ddinkala muttambi mwa iyene. Iyene onfuna amururiye Ezahu. Ddigakosa dhahene dhinokana gari yabure.

Rebeka mamayahe Jakobo ologa:

- Mwanaga, gari yabure enkala na miyo. Okose ewaddele miyo.

Mamayahe bapiya oja ninga mwaziveliwa babe. Iyene bamwabaliya Jakobo guwo dha Ezahu, mbale. Bapopottelra miyono ya Jakobo na ttebe ya mbuzi, wila amunyengette babe.



Jakobo ottukulela oja oli babe. Izaki onvuza:

- Weyo bani?

Jakobo ologa ottambi na bawakula:

- Ddili Ezahu. Ddikana oja okumbilre weyo.

Izaki onvuza:

- Enodheya dhavi omaguva dhahene?

Jakobo ologa:

- Mulugu ohiddivaya gari. Kavenya ovanene.

Kagilati na kaja. Ogamala oddivaye nruriyo naho.

Ovano Izaki karumela. Izaki ologa:

- Kadhahuno okuno. Kaddittiye ddihuttidde.



Izaki opapasa ttebe omiyononi ya Jakobo Izaki banyengetteya na ttebe. Bavuza vina:

- Weyo bani?

Jakobo owakula:

-Ddili Ezahu.

Izaki baja oja wapile Rebeka.



Babe bamukumbilra:

- Kaddifedhele miyo wila dhihusosone.

Banuka guwo dha Ezahu na bamururiya, alogaga:

- Mulugu ahuvaye muzogwe wa odhulu na milima minji ya vati. Malogo anelo ohulaba, attu anela okokora na vari va nriho naho. Okale munddimuwa, abalo ahima a mamayaho anela okokora vamentoni vaho. Mulugu onowakosa yabure abale anahukosele yabure. Mulugu onela waruriya abale anahururiye.



Na dhahene, Ezahu wano wiyela omatotelo.



Ezahu opiya oja wa babe ninga mwaziveliwa iyene.

Iyene ottukula oja wila
amvahe babe. Iyene
baloga na babe:

-Baba kavenyani. Muje
oja opile miyo wila
muddiruriye.

Babe onvuza:

- Weyo bani?

Ezahu owakula:

- Ddimiyo mwanaho munddimuwaya, Ezahu.

Izaki omwakula:

- Akala odhilena oja apano. Bani? Miyo ddiya oja
wetene na ddimururiya. Iyene onela okala
wosanzaya.

Ezahu olila vaddiddi baloga:

- Baba kaddiruriyeni miyo vina. Kamuna nruriyo
nina mwa miyo?

Izaki ologa:

- Weyo onela odhowa okala onddahi wa mattaka a
aderetu, mattaka anvaya milimo dha deretu. Onela
okala onddahi wa muzogwe wa odhulo omotta.
Mbalo dhunakale wowaralaya opitta weyo.





Ezahu bakala wonyonyeya. Jakobo omunyengetta dila bili. Dila yoroma iyene ottukula onddimuwa wobaliwa. Mmalele awene babe bamururiya ninga mwana munddimuwaya. Ezahu wanfuna ampe mbalahe.

Rabeka ologa:

- Kafedhavo vomaguva. Mbalaho onfuna ahupe.

Mmalele ani Rabeka ologa na Izaki, mamunaye, ologanahe:

- Ddafuna wila Jakobo amutele mwiwana wa nlogo naga.

Izaki barumela. Iyene bamuruma Jakobo wila adhowe ahone nlogo na mamayahe.



Jakobo akosaga oledo muzizani ya mahe, wahimurowa Mulugu. Owona sikada mmodha odhulu mpaka vati. Anju a Mulugu antita na bagawela sikadaya. Mulugu omururiya Jakobo, alogaga:

- Miyo ddili Nabuya, Mulugu wa Abaramu na Mulugu wa Izaki. Ddanela ovaya weyo na maziza aho elabo ejo egunantile weyo. Ddinelo oruruya attu etene na vari vaho na maziza aho. Ddili na weyo. Ddinokoya mpule muna weddege weyo.



Nlabo nonawili Jakobo baviologa yeka. “Mulugu wahidha ogumana na miyo apano.” Nona ottukula makura bahika vamwalrani obu wali musago waye. Bakuwela mburo obule Betel (entapulela Nyumba ya Mulugu).



Nona Jakobo ofwara ziza ya mahe. Mulugu
omukoya na banvaya dhotedhene dhafuna iyene.
Mulugu bakala Mulugu wa Jacobo.

Mavuzo:

1. Ana kono akuweliwa ani?
2. Babi wamukweleca mwana gani?
3. Ezahu ocinjilena na eni oja?
4. Efanyelelo ya mwana munddimwa jivi?
5. Izaki adha aluvala wafuna amururiye ani?
6. Bani wafuna omunyengetta Izaki wila attambilre nruriyo?
7. Jacobo omunyengettile dhabi Izaki?
8. Akala wahonyengettile dila moda? Wahiwile opa dhabi?